



GESELLSCHAFT

Letz Rise Up: Strukturelle Rassismus gëtt et och zu Lëtzebuerg

04. Jun 2020 - 15:15

Nom Doud vum Afroamerikaner George Floyd duerch Policegewalt an der US-Stad Minneapolis, ríft d'Association Lëtz Rise Up fir muer Freideg zwou Auer zu enger Solidaritéitsmanifestatioun virun der amerikanescher Ambassad op. Strukturelle Rassismus wier net just e Problem an den USA, mee och zu Lëtzebuerg, soen d'Organisatricen.

Michèle Sinner / cz



Foto: Internetsite vu Lëtz Rise Up

🔊 Lauschtert de Bäitrag vum Michèle Sinner

Dee strukturelle Rassismus géif hei zu Lëtzebuerg net zu esou schroer Police Gewalt féieren, wéi an den USA, esou d'Sandrine Gashonga vun Lëtz Rise Up. Och zu Lëtzebuerg, wou Rassismus zwar zu manner Police-Gewalt géif féiere wéi an den USA, géif en zu Diskriminatioun um Logementsmarché, an der Schoul an an der Aarbechtswelt féieren.

Déi Aussoen baséiert d'Sandrine Gashonga ënner anerem op Etüden. [D'Resultater am Rapport Being black in Europe](#) vun der EU Agence fir Grondrechter, dee virun zwee Joer verëffentlecht gouf, géife Suergen maachen, seet si.

De Rapport géif feststellen, datt Lëtzebuerg eent vun den dräi éischte Länner ass, an deem de Rassismus am meeschte vun de Concernéierte gespuert gëtt.

[Eng aner rezent Etüd vum Lëtzebuerger Cefis hätt gewisen](#), datt beispillsweis Capverdianer systematesch an den technesche Lycéesregime géifen orientéiert ginn. Wäiss Mënsche géifen dacks an de Classique orientéiert ginn. D'Sandrine Gashonga gesäit heiran eng flagrant diskriminatoresch Praxis. Eventuell géif dat onbewosst geschéien, ma nach wier et eng diskriminatoresch Praxis, well ee gesellschaftleche Persounegrupp systematesch benodelegt géif ginn.

Lëtz Rise Up hofft, datt de Freideg ronn 1.000 Persounen de Wee op hir Manifestatioun fannen. D'Participanten si gebueden all hir Masken unzedoen an de virgeschriwwene Sécherheetsofstand anzehalen. D'Organisatrice wëllen an den eegene Reie Leit designéieren, déi dorop sollen oppassen.